

- प्रधानमंत्री नरेन्द्र मोदी कह्यो—दुनिया अर भारत री विकास यात्रा मांय प्रवासी भारतीयों रो खास काम।
- मुख्यमंत्री भजनलाल शर्मा जोधपुर मांय पश्चिमी राजस्थान उद्योग हस्तशिल्प उत्सव रो उद्घाटन कीनो।
- महिला अर बाल विकास मंत्रालय री ओर ऊं काल उदयपुर मांय चिंतन शिविर सरू कर्यो जावेला—महिलावां अर बच्चां रा भला ऊं जुड़्या मुद्दां माथे चर्चा करी जावेला।
- राज्य रा मौसम मांय बदलाव रा आसार—तीन दिन तांई केई ठोड़ां बिरखा व्हेवण अर कठे—कठे ओला पड़बा री संभावना।

000

प्रधानमंत्री नरेन्द्र मोदी दुनिया अर भारत री विकास यात्रा मांय प्रवासी भारतीयों री खास भूमिका बतायी है। वे आज ओडिशा रा भुवनेश्वर मांय प्रवासी भारतीय दिवस री औपचारिक सरूआत रे मौके राखी ज्या जळसा मांय बोल रह्या हा। प्रधानमंत्री कह्यो के साल 2047 तांई भारत ने विकसित देश बणावण रा काम मांय प्रवासी भारतीयों री घणी खास भूमिका है। श्री मोदी कह्यो के भारत सगळा हलका मांय चोखो काम कर रह्यो है अर प्रवासी भारतीय बेगा ई हवाई जहाज बणावण मांय 'मेड इन इंडिया' कार्यक्रम मांय योगदान देवेला। प्रधानमंत्री कह्यो के सरकार नौजवानां रा कौशल विकास अर वां रा बूता ने बेहतर तरीका ऊं काम लेवण माथे खास ध्यान दे रही है।

प्रवासी भारतीय दिवस सम्मेलन काल पूरो व्हेला जिण रा समापन जळसा मांय राष्ट्रपति द्रौपदी मुर्मू रो ई सिरकत करण रो कार्यक्रम है।

000

गृह मंत्रालय सगळा राज्यां अर केन्द्र रा राज वाळा प्रदेशां ऊं जेलां अर सुधार संस्थानां मांय टीबी री बीमारी खत्म करण रो 100 दिन रो अभियान चलावण बाबत् कह्यो है। मंत्रालय ई बारा मांय लिखी ज्या खत मांय ई अभियान रे जरिए जांच शिविर लगावण अर टीबी री बीमारी रा बारा मांय जाणकारी देवण वाळी सामग्री रो दरसाव करण बाबत् कह्यो है। राज्य मांय ई ई अभियान रा तैत भांत—भांत रा कार्यक्रम राख्या जा रह्या है। बारां जिला मांय बामला रा स्वास्थ्य केंद्र मांय चिकित्सा अर स्वास्थ्य विभाग री ओर ऊं शिविर लगायी ज्यो।

000

जोधपुर मांय आज पश्चिमी राजस्थान उद्योग हस्तशिल्प उत्सव सरू व्ह्यो। मुख्यमंत्री भजनलाल शर्मा इण रो उद्घाटन कीनो। म्हाणा खबरनवीस बतायो के 19 जनवरी तांई चालण वाळा ई उत्सव मांय भांत—भांत रा सामान री सात सौ ऊं बत्ती स्टॉल्स लगायी ज्यी है।

000

मुख्यमंत्री भजनलाल शर्मा रो काल बाड़मेर रो दौरा करण रो कार्यक्रम है। ई दौरान वे नगाणा मांय मंगला प्रोसेसिंग टर्मिनल रो जायजो लेवेला। मुख्यमंत्री रा दौरा री तैयारियां रा तैत आज जिला कलेक्टर टीना डाबी अर एस.पी. नरेन्द्र सिंह मीणा मंगला प्रोसेसिंग टर्मिनल रो दौरा कीनो।

000

राज्यपाल हरिभाऊ बागडे री ओर ऊं आज अजमेर मांय ख्वाजा साहब री दरगाह माथे चादर पेश करी ज्यी। राज्यपाल रा परिसहाय प्रवीण नायक अर उप सचिव मुकेश कलाल चादर पेश कर र राज्यपाल रो संदेश बांच र सुणायो। वां रा संदेश मांय श्री बागडे ख्वाजा मोईनुद्दीन हसन चिश्ती रा अमन अर मोहब्बत रा पैगाम ने जनता ताई पूगावण बाबत् कह्यो। वे कह्यो के ख्वाजा साहब रो उर्स विविधता मांय एकता री भारत री संस्कृति री मिसाल है।

000

महिलावां ने मजबूत बणावण ऊं जुड़्या मुद्दां माथे विचार सारू काल उदयपुर मांय चिंतन शिविर सरू व्हेला। केन्द्रीय महिला अर बाल विकास मंत्री अन्नपूर्णा देवी रो तीन दिन रा ई शिविर रो उद्घाटन करण रो कार्यक्रम है। शिविर मांय राज्यां अर केन्द्र रा राज वाळा प्रदेशां रा नुमाइन्दां सागे महिलावां अर बच्चां रा पूरा विकास अर वां रा भला ऊं जुड़्या न्यारा-न्यारा मुद्दां माथे चर्चा करी जावेला। कार्यक्रम मांय केन्द्रीय महिला अर बाल विकास राज्यमंत्री सावित्री ठाकुर, उपमुख्यमंत्री दिया कुमारी अर महिला अर बाल विकास राज्यमंत्री डॉ. मंजू बाघमार, न्यारा-न्यारा राज्यां रा महिला अर बाल विकास मंत्री, सचिव अर दूजा आला अहलकारां समेत करीब डोढ़ सौ जणा सिरकम करेला।

000

बेटी बचाओ-बेटी पढ़ाओ रा तैत जैसलमेर मांय आज मरू उड़ान कार्यक्रम सरू करी ज्यो। जिला प्रशासन अर महिला अधिकारिता विभाग री ओर ऊं राख्यी ज्या कार्यक्रम मांय महिलावां सागे बातचीत री कार्यशाला राख्यी ज्यी। मरू उड़ान योजना रो मकसद प्रदेश री महिलावां ने स्वास्थ्य, शिक्षा अर खुद रा काम-धंधा रा हलकां मांय मजबूत बणावणो है। म्हाणा खबरनवीस बतायो के ई रे ज़रिए मानसिक स्वास्थ्य, खुद री हिफाजत, साइबर अपराधां रे खिलाफ जाग जगावण अर गाड़ियां चलावण री सिखावण रा सत्र ई राख्या जावेला।

000

सवाईमाधोपुर मांय ई आज राजस्थान मरू उड़ान कार्यक्रम सरू व्ह्यो। इण मांय डॉक्टर महिलावां ने शारीरिक अर मानसिक स्वास्थ्य रा बारा मांय जाणकारी दीनी।

000

प्रधानमंत्री नरेन्द्र मोदी आकाशवाणी ऊं प्रसारित कर्या जावण वाळा खास कार्यक्रम मन की बात मांय ई दफा 19 जनवरी दीतवार ने विचार बतावेला। आकाशवाणी ऊं ओ कार्यक्रम दस साल ऊं बत्ता बगत ऊं प्रसारित कर्यो जा रह्यो है। ई महीना मन की बात कार्यक्रम री 118वीं कड़ी प्रसारित करी जावेला। ई सारू आप ई 17 जनवरी ताई मुफ्त नम्बर 1 8 0 0 – 1 1 – 7 8 0 0 माथे राय अर विचार भेज सको हो। ई रे अलावा 1922 नम्बर माथे घंटी दे र एस एम एस ऊं मिल्या लिंक रे जरिए ई सुझाव भेज्या जा सके है।

नरेंद्र मोदी एप या माई जीओवी ओपन फोरम रे मार्फत ई ऑनलाइन तरीका ऊं सुझाव दिया जा सके है।

000

राज्य मांय नुवा पश्चिमी विक्षोभ रा असर ऊं आवता तीन दिन ताई केई ठौड़ां बारिश व्हेवण, घणी धुंअर रेहवण अर कठे-कठे ओला पड़बा रा आसार है। मौसम विभाग रे मुजब काल जोधपुर अर बीकानेर संभाग अर शेखावाटी हलका मांय कठे-कठे बादळां री गाज सागे हल्की बरसात री संभावना है। मौसम केन्द्र जयपुर के निदेशक राधेश्याम शर्मा बतायो के 11 जनवरी ने बीकानेर, जयपुर अर भरतपुर संभाग रा कुछ हलकां मांय बिरखा व्हेवण सागे कठे-कठे ओला ई पड़ सके है।

.....

ई बीचे प्रदेश मांय आज ई केई ठौड़ां जोरदार ठारी रो असर रह्यो। सीकर जिला रा फतेहपुर मांय कम ती कम तापमान 3 डिग्री सेल्सियस दर्ज करी ज्यो। चूरु, दौसा, करौली, बारां, सीकर अर सिरौही मांय ई न्यूनतम तापमान 5 डिग्री सेल्सियस ऊं नीचे रह्यो। ई सागे ई लगभग पूरा प्रदेश मांय न्यूनतम तापमान 10 डिग्री सेल्सियस ऊं नीचे रह्यो।

000

जिन्दगी मांय नुवी उमंग अर ऊर्जा पैदा करण वाळो सकरांत रो पर्व हर साल 14 जनवरी ने मणायो जावे है। प्रदेश मांय ई मौके केई ठौड़ां पतंग उडावण री जूनी रीत है।

000

कोटा—श्री गंगानगर—कोटा एक्सप्रेस रेलगाड़ी आवता दिनां बदली करी ज्या गेला ऊं चलायी जावेला। कोटा—श्रीगंगानगर एक्सप्रेस 24, 26, 27 अर 28 जनवरी ने अर श्रीगंगानगर—कोटा एक्सप्रेस रेलगाड़ी 26 अर 27 जनवरी ने सूरतगढ़—हनुमानगढ़ री बजाय सूरतगढ़—श्रीगंगानगर व्हेती थकी चलायी जावेला। बदली करी ज्या गेला मांय अ गाड़ियां रायसिंहनगर टेशन माथे ई रुकेला।

000